

哲紙

外大嫗的墓地是著珠螺，蜀其僅少儂會邁的山陂。每蜀年去哲紙，都著穿過蜀片勃野密的青竹团，尾斗會看見蜀塊比我兩邊手固大的石頭碼，企畝彼哪，夫塊就是我外大嫗的墓地。

依媽講彼辰候，底儂老了忸是使蒿籬包儷，埋畝自家畝地？再企蜀塊石頭碼，就當著是親儂過後住的厝。

石頭碼後斗饑起的塗堆，真像依媽帶身喜的腹楸。外大嫗漢馬一定野嫩，入塗辰候身軀可能是彎的，就像侂团团窩畝塗地娘娘心兜蜀樣樣。

每蜀年，雜^ㄉ野草（細竹、槭葉牽牛、風藤、薛荔、海桐苗），野像有儂哩教，著墓地攤駁舞手；我共依媽都著動手，搭雜^ㄉ野草逐出墓地，再寬寬心拾刷清楚。搭紙錢哲畝石頭碼底下，都做平搭以後，最後乍開始拜祭外大嫗。

依媽點香，炙紅的香線火煙慢慢昇天，外大嫗會捌儂家來了。

「依嫗！我帶姿娘因依馨來看汝了喔！儂家準備野^ㄉ錢紙、箔、固有元寶，汝著來掏啊！依公已無塊討了，汝著自家去討，討著了，著記來錢著齊齊使啊！」

依媽手捻香線，嘴裡使馬祖話輕輕聲唸，野像伊講的話，會跟火煙上天，傳乞百幾年以前的大公、大嫗，希望伊各儂著天上有食有頌，安安心過日子。